

四庫全書

集部

欽定四庫全書

集部

襄毅文集卷二

詳校官庶吉士臣陳若霖

中書臣劉源溥覆勘

總校官檢討臣何思鈞

校對官中書臣楊世綸

謄錄監生臣沈洪

欽定四庫全書

集部六

襄毅文集

別集類五明

提要

臣等謹案襄毅文集十五卷明韓雍撰雍字永熙吳縣人正統壬戌進士官至右僉都御史總督兩廣正德間謚襄毅事迹具明史本傳明自正統以後正德以前金華青田流風漸遠而茶陵震澤猶未奮興數十年間惟相

沿臺閣之體漸就庸膚雍當其時雖威行兩  
廣以武畧雄一世不屑屑以雕章繪句為工  
而英多磊落之氣時時發見於文章故雖未  
變體裁而特饒風骨其雜文亦高視濶步氣  
象迥殊韓愈所謂獨得雄直氣者殆於近之  
朱彞尊明詩綜但稱雍有集而不著集名所  
錄雍詩一篇又非佳作其賜遊西苑記日下  
舊聞亦不載靜志居詩話絕無一字及雍殆

偶未見斯集歟乾隆四十六年十月恭校上

總纂官

臣紀昀

臣

陸錫熊

臣

孫士毅

總校官

臣

陸費

墀

欽定四庫全書

四

提要

欽定四庫全書

襄毅文集卷一

明 韓雍 撰

五言古詩

同年會詩分韻得吻字

近辱亞卿姚年兄書言正初黃門宋宗魯倡一同年  
會序齒不序爵會者僅三十人狀元劉先生以鹿鳴  
詩分韻在席皆有賦公在外必以不預為恨於是效

洛下故事留吻字一韻專俟發揮得書三四讀不能  
釋手此蓋亞卿諸公不鄙雍遺玷同年欲與進之意  
甚盛也顧不敏不足以發揮盛事然念昔洛中耆英  
之會王宣徽留守北都不得預致書潞公有願寓名  
其間幸無我過之語始獲預焉其會與今會雖不同  
其有關風化為人所嘉義則同而況亞卿諸公以書  
招我若固以不敏辭是不知感激果於自棄矣遂依  
韻賦五言古詩一章以塞白且期後會諸公必能改



教我

憶昔甫弱冠鹿鳴歌呦呦遂能從羣僊直上瓊林遊瓊  
林探名花少年我其尤同披宮錦袍共泛黃金甌一時  
吐壯氣浩浩橫九州豈徒踐董賈實欲肩伊周竭來十  
五載各有官守憂友情膠漆深宦迹參商侔榮落雖或  
殊大閑鮮遺羞賢科稱得人吾榜居最優邇聞黃門第  
開筵集斯流尚齒不尚官歟曲偏綢繆尊疊疊獻酢珠  
玉紛賡酬我慚鎮南邦末席趨無由忽得春卿書分韻

為我留旦準昔同列推薦行陰謀王聶始同曹敗履終  
相讐彼皆古同年智愚難匹儔作詩附終篇相期鑒前  
修明秋我入覲後會知能不

題行臺驄馬行春圖

芳春日和煦乘驄遠巡遊品類遂生育嘉景羅道周青  
山高挿天綠水深不流喬松與脩竹歲寒君子儔紛紛  
李桃花競艷俱含羞觸物感時叙方寸恒多愁誅鋤奸  
宄凶一道風霜秋斯乃職分常孰較劣與優所貴布德

化先解黎庶憂于焉起沈滯于以伸冤幽惠此旣獨民  
而且扶善柔所行苟皆春厥職斯無尤况嗟國步艱切  
齒期復讐勤王無路歸空橫濟川舟寫圖警朝夕龜勉  
追前修

壬申歲暮預約同寅余公新正郊遊值霖雨悶甚  
正月三日因攜壺獨酌貢院池亭悵然有懷

天眷隆淺薄日夕不寧處茲焉肇新歲崇朝積陰雨念  
此休暇期客抱無可語呼童攜斗酒聊此適襟宇豈但

解勞瘁亦以樂治理高亭獨危坐八憲靜如洗亭下方  
池深舉網得鮮鯉烹鮮浮大白感嘆不能已堪輿寄渺  
然固知若逆旅君親德未酬徒以身自許所幸年未暮  
勉進或有取誰能副我圖悵然憶知己

再用前韻奉酬同寅余公持敬

天將啓中興神龍在淵處一朝飛在天雲從作霖雨若  
人素端重殊無妄笑語棟梁美才具圭璋秀姿宇臣鄰  
帝左右四海率化理豈但蠻夷賓更誇甲兵洗羨君風

雲會不殊禹門鯉棘寺蘭臺榮超遷正未已用罰克明  
慎體念大易旅丈夫幸遭際何須義巢許默默古所羞  
諤諤古所取相勉陳嘉猷致君日恭己

苦雨阻風夜泊劍江龍霧洲述懷十二韻三月四  
日也

積霖殆三旬陰雲不能掃深江浩無涘滔滔走黃潦怒  
風長號鳴排空雪山倒東作已逾時耕子心悄悄百穀  
未始播平疇尚豐草農事或荒廢生民曷溫飽蹇予德

淺薄致此灾沴兆惕焉發深省中懷自憂恤誰能補天  
漏捧出日杲杲雨暘允時若稼穡遂堅好維舟坐終夜  
無計叩穹昊古聞誠可格我但精意禱

寄鄉先生張養正鑒師

君子抱道德所志恒在民達則善天下窮亦思濟人濟  
人伊何切鑒道體至仁先生吳中彥鑒名冠時紳早承  
家世傳羣書探其真療病固本元制藥分君臣死生一  
脉決其應若有神沈痾一劑起奇効時能臻且其不責

報嘗欲先賤貧所以賢大夫禮遇隆嘉賓宋清韓伯休  
鄙哉何足論越人與元化足以繼後塵況其卓犖才高  
談妙經綸斯人苟出仕所志回陽春偉哉張先生鑒中  
之鳳麟作詩寄遐想用俟觀風陳

贈別李文曜少卿

仲冬倏云暮朔風始淒其寒雲吹不開凍雨連朝霏征  
夫倦行邁暫爾停葛溪命駕訪故人夜方抵其廬故人  
忻我來呼童羅酒卮勸酬心孔懽痛飲何能辭重念賢

昆季能文復能詩隱顯雖不同聲名皆四馳蹇予涼薄  
才托交共襟期茲焉或傾倒開我茅塞私我笑王子猷  
雪夜訪戴逵一棹至剡溪云胡遽然歸又笑嚴中丞草  
堂訪布衣禮遇雖或勤中懷積町畦宣若吾主賓一誠  
弗相疑友道固若是彼徒紛紛為僕夫告夜闌漏鼓聲  
遲遲振衣出門去伸謝寧無詞

鄉友張汝明陸宗海宗湜宗博皆良契也別久而  
思申友道以告之蓋寓內交之義云耳



伐木詩久廢友道益以缺紛紛市井徒權貨日交接權  
門勢方盛炙手時可熱一朝勢或傾掉臂隨斷絕貨室  
利可資相親競諛悅有時利或盡反面肆欺蔑翟公曾  
書門馮驩亦喻說斯迺理自然古人言至切我嘗處鄉  
邦所友多俊傑一張與三陸門第皆閥閱四人與我游  
情好固優劣彼非因勢趨我非因利結有義恒相規有  
過恒相訐膠漆意永固芝蘭味無別睽違甫二載遠懷  
不能歇嗟我門第衰一弟更單子西山日薄時有力不

能竭定省無歸期中腸自嗚咽况乏裨益才所至嗤政拙深慚立堪輿虧此忠孝節所賴惟同心旦暮一扶挈我愛晏平仲交久敬不輟又愛朱暉賢妻子託能愜作詩寄殷勤此心誓如鐵相勉永弗諼期以效前哲

九江候孟誠李都不至而回留此寄情

同年復同官別久重相憶聞君北堂訃使我增惻惻遠來致生芻蕘之慰憂戚山頭側身望十日未能即試問東來船杳然無蹤跡匍匐無計往而且乏羽翼况奈心

事牽匆匆逼行色空須悵然歸欲候那可得莫嗔南風  
狂莫怪江水逆古稱會面難何時此情釋願言節哀痛  
終圖報深德

直齋古詩為鄉人韋孟誠題

平生方寸間秋毫未嘗蓄譬之勁弓弦力挽不能簇又  
若剡木矢寧折不可曲嘆彼姜公輔售名徒取辱豈如  
史魚賢宣尼亦稱服勗哉鑒諸古不渝允終穀

輓樂僉憲妻劉孺人

古有樂羊妻勸學嘗斷織又有姜詩配養姑孝能力寥  
寥千載下孺人繼芳蹟淑德馨芝蘭貞心厲金石相夫  
學成仕秉憲克善職奉姑養厥志匪但豐衣食況能教  
子姓尤善遇宗戚所以賢哉名里閭共欽式遂承天恩  
褒紫綬映朱翟年方躋下壽易簣遽永畢崇岡玉深埋  
碑有太史筆觀風採列傳光榮耀無極

久苦淫雨喜晴登聚奎樓有作

五月十二日也

旬時苦淫雨不得頑雲開平湖漲瀾漫矮屋垣多頽四

郊亦茫茫未泰傷胚胎  
吾民失生業田叟尤悲哀  
博施志雖勤濟衆誠難哉  
慙無變理能獲戾曷敢推  
荷此蒼蒼仁幸矣回凶災  
朝陽發光彩飄風自南來  
長養萬物成且阜斯民財  
登樓一舉手倚欄重徘徊

登湖口上鍾岳閣有感而題

愛此江閣幽維舟坐終日  
本徒玩化理不是荒遊逸  
分少陵詩句壽漁樂先生七十

練川有達士德誼重播紳  
軒冕非所圖以漁樂天真五

湖浩烟波扁舟一絲綸子陵富春山呂望渭水濱遺風  
邈百世于今覩斯人昭代訪遺賢會見迎蒲輪

右人字

春秋脩云邁林泉寄餘生有子經濟才憲府蜚英聲推  
封拜嘉寵龍章下承明烏紗豸錦袍白日昭光榮人生  
有斯樂况值時治平仰天一大笑舉杯勸長庚

右生字

賈藝不欲售甘心事休逸老陪香山九賢如竹林七一

朝天恩下光輝照蓬華脫却逍遙巾從容佩簪紱芝蘭  
間玉樹蹒跚遠前膝舉觴祝親壽願與南山匹

右七字

桑榆景彌好福祉自天錫偕老復壽康安居享祿食練  
川喬木家屈指百無十新秋時雨霽華堂薦紳集金樽  
注流霞飲如長鯨吸酒闌月初上光芒照南極

右十字

平生厭塵俗雅志素希古優游林泉下甘與麋鹿伍壽

考躋七旬祿養享三釜佳辰集良賓肆筵設樽俎翩翩  
青鳥來蟠桃送王母棄核齊崑崙遐齡豈勝數

右古字

新秋紱麟期清風自天來烹龍且烹鳳華堂壽筵開有  
客海上至自云出蓬萊喜君壽且康為獻沝霞杯主人  
心孔歡須臾玉山推遙遙故鄉心何當一追陪

右來字

宿雲淨遙空瑞彩騰少微亦有南極星中宵爛光輝哲



人初度晨眉壽世所稀  
朝陽丹鳳雛翩翩歸高堂  
敝華筵珍羞擊鮮肥  
歲歲祝長生孝子心無違

右稀字

送簡菴王先生叅政湖廣

條風扇微和凍柳青  
始萌載酒出東郭  
言餞君子行舉觴未及酬  
潸然涕沾纓念昔侍芹泮  
知遇如平生慙慙道愚蒙  
學業幸爾成感此恩義重  
欲報心怵怵同朝二十年  
豈異骨肉情方資永承式  
遽爾歡戚并喬遷佐雄

藩買舟趣脩程且展經濟畧大拯瘡痍氓坐使湖湘間  
境土悉以平勲庸動宸極召用諒匪輕斯時重盍簪相  
與匡文明匆匆不盡意落日催雙旌目斷灤河舟夢遶  
江漢城衡陽雁北來勿惜頻寄聲

寶善堂為姚亞卿鄉人題

世德恐或墜名堂在瑤林守茲萬端善何啻雙南金克  
闡父祖志允師聖賢心勗哉永弗渝餘慶來駸駸

雨中招陸尚文

積雨生百感，緬懷舊朋遊。記得布衣時，曾上君家樓。君家慈母賢，延欸禮最優。維時作霖雨，欲歸苦相留。對牀且三日，講道何嘗休。一從硯席分，屈指二十秋。踪跡雖闊遠，此心更綢繆。憐君命猶乖，壯志良未酬。有司選才行，纔看謁宸旒。已登青雲階，高步諒匪憂。而我獨戀戀，訪問嗟無由。請君夜話來，消我萬斛愁。

問林同寅李聰疾

良契久在告，單居苦無聊。窘然坐臺署，日盼趨晨朝。得

書知未能悵然心旌搖宣尼且謹疾煩君益珍調

陳緝熙修撰先隴十詠

靈巖晴旭

暘谷升朝曦靈巖發晴光巒峯削金碧林木流葱蒼延  
暉入琳宮影落浮圖長孝子葵藿心傾向亦皇皇

震澤秋蟾

巨浸不可測羣山繞其潯夜深上圓景天水光相侵風  
帆照遠近沙鳥明浮沈徹底年年清照見哀哀心

光福烟霏

山寺延倒景烟霏坐來深殘紅斂傑閣浮翠迷遙林歸  
鳥暝靄中高塔亦陰陰暝色欺淚眼猶聞鐘磬音

穹窿雲氣

山川有佳氣飛飛滿穹窿變態既靡常間色亦匪同隨  
時作霖雨贊此化育功凝睇不可休疑親在雲中

天平嵐翠

天平帶晴嵐蒼翠彌蠻岡松筠既叢茂泉石亦幽芳先

正百世人廟食山之陽眷言慕遺德至孝能顯揚

海雲茶屏

海雲近佳城佳樹特連理  
英英著冬花壘壘屏障起  
紅芳冒冰雪羞與桃李比  
元勲光舊廬吾慕逃虛子

寄心脩竹

禪林茂脩篁翠影蔭玄室  
清風入林杪鏘鏘奏金石  
六逸不可招七賢已陳迹  
感古重傷今遊魂竟何適

古廟喬松

廟古松亦古居人不知年直幹凌碧落深柯入黃泉上  
有白鶴巢下曾見牛眠殷勤築禁步勿使根株連

沃壤西成

平疇萬頃餘多稼垂秋成農人畢收穫坐見百室盈比  
屋既足食公家亦寬征孝子薦時羞取以供粢盛

伏龍晚睇

伏龍來東南蜿蜒氣凝結孝思卜先隴神人指真穴登  
高竚遐瞻暮景慘分列髣髴見親容長吁淚成血

送程僉都彥實出鎮遼東

得其字

彤庭拜簡命，領節安東陲。平明出都門，冠蓋如雲隨。祖  
觴未及酣，相顧何淒其。念子公輔器，德懋才且奇。早年  
歷清華，聲望蔚四馳。喬遷佐臺憲，風紀資維持。懼會曾  
幾何，曷忍遽別離。遼陽古重鎮，付託惟君宜。君行益慷慨，  
慨所至。諒有為千里桑麻場，百萬貔貅師。要使耕鑿遂，  
而且甲兵治。天驕憚威聲，塞外不敢窺。庶分東顧憂，少  
答寵眷私。微雨路塵淨，輕風楊花吹。膏車秣馬行去去。



莫我遲臨岐把衣袂更有叮嚀辭丈夫感知遇圖報須  
及時功成早還朝慰我遙相思

送張起韶寺正出守保定

都門歇時雨旭日晴光流之子拜嘉寵南行典名州名  
州近京國民物富且稠古稱治亦難而今簡才優惟君  
瑚璉器早歲登瀛洲作官三十年直道從淹留再登棘  
寺選不喜亦不憂平反著勞績賢聲徹宸旒于茲付重  
寄期解黎庶愁君行勿怠荒庶以答鴻休漢廷有循吏

通顯登列侯丈夫幸逢時儼美當操修

作朱中書文徵猶子字說兼勵以詩

雲間有華族世德鄉閭推隱君德彌彰六子生絕竒芝  
蘭間玉樹森森列階墀頭角皆嶄然奚止稱白眉伯也  
幹父蠱克家禮無違次雖少長殊立身率能知長者向  
文學場屋事可期少焉就外傳取友能得師進修不怠  
荒成人理無疑我悉命以字走筆摘文詞厥字義孔深  
諸子當潛思荀氏十龍駒竇老五桂枝聯芳載典籍千

古家聲垂勉旃踵遺休圖報明盛時

寄大司馬王公度

大才不易得時艱良可憂所以古聖賢治世懷遠猷名  
公欲致政周公勉相留二公心德同儷美匡成周芳聲  
播千古人皆仰前修堂堂王司馬當代第一流以身徇  
國家才氣誰可儔方茲任經濟整頓多事秋如何在告  
中遽爾得退休不知諸同列亦曾勉留不昨簡掌邦政  
朝廷廣詢謀黃門御史言稱職惟君優上允即超拜四

方動懽謳茲聞勇退歸物議皆啾啾嗟予忝知己痛惜  
不自由所惜為天下匪為君身謀四方水旱多賊盜方  
且稠須起出羣才同心運良籌淵衷必有在士論終當  
收君其善養年予未歌四愁

六月九日雲中行臺池亭偶成

卓午火雲起三邊且炎蒸薄暮亦煩倦池亭試閒登須  
臾山風來襟懷爽如水輕羅不可試重衣更須增步還  
坐中堂蕭然一青燈因之發感嘆庶以知自懲

十二月二十有八日余與總兵官彭武伯楊公副  
總兵都督曹公地官郎中羅公習正旦儀於善化  
寺禮既畢楊具酒肴邀鎮守太監王公守備中貴  
羅公同此小酌以為歲暮休暇之樂余浩然興發  
因成五言古詩一章聊叙情曲且識余感

流光一何駛冉冉芳歲闌嗟我裨益疎幽懷弗能寬所  
幸封域內物阜民且安既習嘉禮成聊此閒遊觀內相  
三槐後情意如芝蘭總戎出關西才器比琅玕謙冲副

帥先教子同登壇豫章先生裔中貴及地官並馳英俊  
聲相從此盤桓禪窟大如斗兀坐無嚴寒總戎邀麴生  
羞膳羅杯盤忘形到爾汝勸酬心孔懽餘酣豪氣充彼  
此戒素餐丈夫感知遇豈憚世事難側聞河套賊西夏  
為驕奸安能建長策奮飛擒可汗上報明主恩盡此方  
寸丹局促空太息不得生羽翰拂袖歸行臺留題後人  
看欲問作者誰臺叟吳門韓

圖韓范二公經畧西夏事跡于正心堂之壁各系

以詩著志也

魏公真間氣出也遭時亨芳年掇巍科柄用良匪輕諫  
垣累抗疏四海蜚英聲望重官益尊台鼎司鈞衡危疑  
決大策宗社賴以平元勲固莫加雅量孰可名維時孽  
寇賊西夏為縱橫帝簡出羣才命公秉鉞行公行志有  
在壯氣何崢嶸誓欲復土疆肯效城下盟軍容若山動  
威令如雷轟賊聞膽已寒下馬遙相迎奉表願納貢曷  
敢復戰爭山林有羣盜聞風亦憂驚薄伐即送降不假

血刃征坐令數千里藩鎮皆銷兵  
豈惟邊患除公尤撫邊氓開倉大賑卹百萬死復生  
西人感公恩處處生祠成朝夕共瞻拜  
如念慈母情天將傾西北賴公手能擎  
人懷左衽憂賴公終弗更一世揚偉蹟  
萬古垂光榮題詩仰餘光北斗天中明

宋室治已久三垂悉安生西賊何奸驕  
卒然背初盟秦中既告急朝野咸震驚  
范老獨慨然誓欲此賊平面受聞外寄胸中  
百萬兵跨馬提寶刀長驅莫敢撓  
攫侵疆始



遍歷成算先已行大順當要衝賊必紛紛爭板築倏云  
具旬日完高城賊聞傾國來相訝如神明揮軍與血戰  
敗北僵屍橫從茲膽已破不敢窺咸京蜀羌亦歸心願  
入為編氓公能推誠信撫接如孤嫗營田萬頃餘勸課  
皆開耕西成富收穫百室俱充盈有無時樵遷日中通  
民情干戈既偃息所至壺漿迎歸來告天子報功亦非  
輕黃閣贊大猷事業尤忠誠惟公千載士豈但人中英  
先憂與後樂有志事竟成泰華擎空高江漢徹底清沅

風播永世忠獻齊芳名

夏太常碧梧翠竹圖為林同寅季聰題

孤桐何亭亭脩竹亦嫋嫋根株起泉石相引入雲表喬  
枝潤玄雲密葉搖翠葆所嘉清標同非比華色好芳春  
鬪妍姿啗彼衆花草一時固悅目零落苦太早節操豈  
若茲霜風不能撓良材世皆惜大匠解品藻棲食招鸞  
鳳厥美謾稱道虞廷取制作音韻天下少

淇園晴翠為前人題

芳蓮出淤泥紅藥翻雕闌托根既匪固塵滓亦瀰漫驚  
風將雨來艷麗紛凋殘此君自幽潔玉立淇水灘氛埃  
弗能侵竒石與盤桓豈解避盛暑惟知耐祁寒風雨時  
一過園丁報平安勁節不少摧秀色益可觀都臺有君  
子雅操世所難太常交誼深比德寫琅玕流芳嗣衛武  
題詩後人看

三茅觀與左遷錢學士致仕陳太常讌集分韻

攬衣上高軒開軒俯遐荒江山界吳越勝槩非尋常雲

起風隱隱潮生浪滄滄好風入我懷冰雪生襟裳眷言  
我同心聊此盡一觴一觴未及酬冥思熱中腸丈夫感  
知遇圖報心遑遑豈須薄江湖何暇思廟堂但使吾道  
行咸能濟時康所以鄉先正進退憂弗忘我希古之人  
歲月悠且長何以誓此心仰視白日光

右滄字

三茅一何奇門與越山對西湖在何許蒼茫隱其背絕  
頂多樓臺從來幾興廢喬林掩映好百鳥聲瑣碎我嘗

乘使車踪跡窮宇內山川亦周覽佳麗鮮可配來茲集  
良賓頓覺精彩倍子瞻方謫宦若水已勇退行藏雖匪  
同心志總弗昧芳尊叙寒暄新咏寫肝肺瓊林粲珠玉  
但覺我形穢去去各勉旃流芳踵先輩

右對字

張司訓乃尊松坡翁輓詩

我嘗持使節幾到于越城駐節訪隱君知有松坡名松  
坡不嗜進雅重月旦評道義施一鄉濟利良匪輕一經

授佳器卓卓蜚英聲登科作師儒能使斯道行乃知松  
坡德流衍在後生茲已作古人聞之欲沾纓鄮湖水已  
落弋溪鳥空鳴欲養不可回孝子難為情勗哉圖顯揚  
終可慰九京

壽趙總兵

三首

去年祝君壽艤舟瀟湘灣今年重祝君遙遙望梅關梅  
關如在天可望不可攀寫我心中私祝君比南山

別來未旬月夢寐懷斯人允為三軍帥拯此兩廣民曹

彬不妄殺羊祜心更仁仁者壽必遐綿綿等莊椿  
夜起視河漢將星光新新蒼姬運中興崧岳生甫申時  
事亦孔艱匡濟惟良臣願言宏厥施乂此烝烝民

十二月二十有三日發梧州之潯與二三同事小

酌書感

遐荒歲云徂行役猶未休晨起戒舟子理櫂泝急流笳  
鼓聲初喧舳艫蔽江浮亂石白齒齒激湍清瀏瀏長風  
飽蒲帆薄暮方始收嗟我本駑鈍辭親恒遠遊烏烏亦

有情豈不懷故丘時事方孔棘恩遇亦未酬  
春茲弗荒寧奔走不自由所幸二三友同朝  
舊朋遊且與倒一尊解我百責憂重裊坐廣  
堂高爵等列侯丈夫苟有志視此同一漚所  
貴慎明德建功踵前修舉杯望青天思飲月  
底頭

寄王畏齋

兒從故鄉來一一問鄉舊見說畏齋老風神  
益明秀華岳出晴空孤松立霜後詩書老不  
倦日夕娛俎豆平生



丈夫心耿耿自天祐遙誦南山詩祝我仁者壽

拙齋為馮泰題

世俗多尚巧馮生志守拙巧或取機禍拙豈見顛蹶先  
聖有嘉言如愚且欲訥藏修務實踐庶以光閎閎

寄酬王同節大理

抱病厭塵事懶通交游書辱我同心人慰問何勤渠華  
札累數幅新詩綴瓊琚陽春曲調高欲和慚不如况予  
久思退猶荷頻吹噓感德報未能臨緘重躊躇

躊躇念君子友道一何篤同年同列情終始高世俗量  
涵子明度德繼魏公躅廉公擅美譽平恕罔冤獄高門  
未是榮崇臺豈云足輔世須大賢相期秉鈞軸

題行臺喜雨堂

提兵靖南蠻三載兵始收吾民尚凋弊所事惟田疇如  
何耕植時未見雨澤流地拆苗漸槁比屋聲啾啾且聞  
中原地旱亦傷來年中原流徙多北敵懷奸謀一或歲  
大凶所在生百憂我忝大夫後與國同戚休德涼名時

灾恐懼當禱求聖主重民命祀神禮先修詔未臨海邦  
氣已潛通幽果然賜甘澤旬日遍九州枯槁咸回蘇百  
穀定有秋酷暑亦淨洗炎荒涼颼颼聖德與天通民亦  
知所由兒童競鼓舞父老齊歌謳小堂適苟完懽感惟  
我尤羣公攜酒至且有新詩投扁以喜雨名酌以黃金  
甌我愧不能當題詩紀皇猷

世儒堂為俞山人

昔承俞山人遺我叅同契因之訪南國知是儒者裔華

胄遙遙來傳書十餘世隱顯雖弗同守業不少替卦探  
伏羲畫辭講三聖繫踐履無愧怍著述有文藝手澤尚  
如新遺像猶未敝山人益克肖講學了生計阿母守貞  
節旌書表門第見重瀛洲仙名堂與佳製賢聲播三吳  
慶澤衍千歲勗哉子若孫箕裘謹終勵

戊子十月五日與鎮守太監陳公巡撫都憲陳公  
總兵都督馮公遊端州七星巖

二氣初盪摩精華巧融結清濁既分判崆峒見巖穴初

登覺幽深旁轉更高縈嶙峋起玉桂繚繞垂綵纈寒溜  
浮空明巨石羅曲折逢逢擊地鼓洪響不外泄乃知化  
工神難與俗儒說丹青筆雖妙誰能寫奇絕良辰羽書  
稀聊此一怡悅辱我同心友歎留出佳設坐久毛骨寒  
恍如在冰雪舉觴勸滿飲浩歌激壯烈丈夫感知遇圖  
報心孔切所愧才德荒弗能繼前哲正誼不謀利臨事  
秉大節仰視蒼蒼天此心誓如鐵

輓琴川錢恒軒先生

乃子昕叅政湖廣

洒洒美髯翁玉骨冰雪姿養高虞山下世利何嘗思家  
儲累萬石雅志惟好施積久報亦宏有子昌明時飛騰  
踐華要清望海內知推恩錫龍章輝光照門楣身繡耀  
閭里晚景心顏怡如何忽觀化竟爾迷所之生榮死亦  
哀全福誰能追磨崖表新阡隱德千古垂矧茲廟堂祀  
豈久淹藩籬寵光賁幽泉加贈定有期

奉萱堂詩為吳縣主簿李京春題

李君佐鉅邑奉萱有高堂名堂意云何孝子心彷徨父

今不可見母也幸壽康昔年故里思母情孔傷令迎  
就祿養在客如在鄉放衙晴日晡閉戶清宵長堂中具  
尊俎阿母升方牀錦衣率子婦稱壽在膝傍時新薦珍  
羞家釀傾瑤觴承順母顏色欲我憂盡忘鶴髮明翠冠  
童顏照霞裳母心安且樂遐算應無疆况君負俊才佐  
邑人稱良從茲懋聲蹟遠到未可量明鏡頌光庭鸞鳳  
美仇香願言踵先哲顯揚更流芳

朱揮使昆仲南園八詠

半畝塘

先翁愛清致鑿池百步週徹底見泉竅慶源時時流

一鏡亭

池水明似鑑結茅當水深波光兼月華照見友恭心

釣魚磯

香餌投清池得鮮不須買還擬取巨鰲長竿向東海

盟鷗石

二難總忘機盤礴坐雲骨白鳥知此心浮波不肯沒



梧桐井

寒甃蔭佳木報秋孤葉低殷勤為培植將有鳴鳳棲

芙蓉臺

拒霜初著花秋色滿堤堰隨時守清素肯向東風怨

採蓮舟

水花開滿池小艇自尋摘還截碧甯盃斟醪勸佳客

栽菊徑

繞籬植寒花相對自怡悅豈但顏色好愛彼守晚節

葑溪雜興

霜重林已空風高水愈涸荒園一散步暮景覺蕭索忽  
見古梅樹橫斜出籬落攬衣看枝柯相將綻紅萼歲寒  
幸有此氣味儘可託

次韻留別徐武功先生

公昔秉鈞軸清班領斯文明良契魚水慶會乘風雲忠  
誠帝簡知譽望誰不聞松筠挺節操蘭桂揚芳芬何期  
麟鳳姿誤陷豺虎羣一時暫爾屈四海清名信人情自

薄惡世事多紛紜而今媚疾徒屈指有幾存揮毫跡已  
富著書業尤勤欽仰懸九州韜晦居海濱我慚拜嘉命  
南陔統三軍餞送有佳章深感知己恩駕駘逐驥足女  
蘿附松根我欲助聲光相與流八垠請看周與召同著  
萬世勲

次韻留別陳大叅宗理

久交意綢繆遠別情放宕風日揚輕暖江山麗形狀多  
君志絕人名檢不少喪制科奮登庸衣繡侍天仗祥刑

筆回春按部氣消瘴出叅幾名藩在在茂聲望教養功  
已成羣盜孰能抗惟公一去來民俗繫升降至今西川  
人萬口感君貺身休林樹間功勒彝鼎上離懷何足寫  
高義曷敢忘况辱餞送詞絕妙是宮樣心閒學愈進氣  
老句彌壯達士冠鄉評吉人永神相萬里遥遥心相思  
隔天壤

次韻留別祝大叅惟清

金門同待漏紫塞同行春倏忽三十年流光如隔晨君

昔總邊賦與我嘗相因籌謀鼓士氣談笑清邊塵我有  
朝天行送別桑乾津桑乾水清淺難垂任子綸還期釣  
東溟斯得橫海鱗君乃獨勇退風節超羣倫金帶橫緋  
袍還鄉叙交親湖山稱雅志詩酒娛閒身良會屢見招  
義氣高雷陳君雖樂取友我豈能輔仁而今忽遠違相  
望如參辰贈我有佳製鏘然鳴韶鈞陽春和誠難魚目  
慚混珍

善慶堂為祝大叅賦

玉音褒先德華扁侈上恩揭之君子堂瞻仰無朝昏我  
聞先大夫德善夙所敦積累既云厚衍慶遺後昆卓哉  
人中英擢第登黃門獻納著勞績進秩叅名藩政成帝  
簡知封制出天閤榮恩不及養此恨那可論羹牆見形  
容水木思本源流澤不可忘扁此示子孫子孫亦知感  
孝養隆所尊題詩表世美聲光耀乾坤

劉僉憲廷美小洞庭十景

隔凡洞

洞庭林屋洞天中有大書隔凡二字饒之石上小洞因效之以名

林屋洞天好似不通人  
寰君家小石巖亦在雲水間  
紅塵自南陌樂事非東山  
辭榮休此中世事無相關

題名石

古之文士遊名山必有題咏小山雖不足觀而徐武功陳祭酒諸公亦嘗來遊

各有絕句以題其石

小山石奇絕諸老心所耽  
翰墨題姓名視古亦何慚  
退之天封宮子瞻仙遊潭  
紗籠謹蔽護千古留美談

撚髭亭

王嘗學詩即山之西麓開亭曰撚髭粗句多於此構成蓋取盧延遜吟安一箇

字撚斷幾莖髭之句

閒亭恣吟情起坐不自省霜髭時復撚得句欲清警神  
遊李杜壇思入陶謝境家聲占詩豪誰敢更歌郢

臥竹軒

莫笑田家老瓦盆自從盛酒長兒孫傾  
銀注玉驚人眼共醉終同卧竹根杜少

陵詩也小山東構軒於叢竹中號以卧竹酒  
闌賓散時醉卧林下則知少陵之詩不我欺  
也

作軒當竹林客至延入坐酒闌客散去高枕竹根臥伯  
倫興方豪子美詩謾和自笑塵中人如君有誰箇

蕉雪坡

唐王摩詰嘗畫袁安卧雪圖有雪中芭  
蕉蓋其人物瀟灑意到便成不拘小節



也 珏亦嘗有志  
繪事故名其坡

摩詰畫已神意到不拘束雪中芭蕉樹相應如碧玉惟  
君妙丹青下筆絕塵俗林坡足揮掃輞川圖可續

鵝羣沼

晉王逸少觀鵝而得脫法之妙山陰道士嘗舉鵝相贈珏學書久而未成因名

其沼以著景仰  
昔賢之私云

學書宗右軍放鵝滿清沼觀鵝得脫法妙出人意表墨  
池洗未涸蘭亭臨已了揮灑滿世間誰言晉書少

春香窟

以刺梅木香雜品花卉結成一室  
花時宴坐其中幽香襲人可愛

花樹結成幄花時香遠聞主翁來宴坐百和常芬芬燕  
寢閒自凝朝衣不須薰笑彼沈檀亭豪奢何足云

歲寒窩

以檜柏結成之歲徂則蒼翠鬱然  
用是名窩蓋重其有後凋之操也

萬卉盡凋落檜柏猶蒼蒼愛茲歲寒操結窩與偈得直  
幹並凌雲真心同耐霜堪憐梁棟材未得登廟堂

橘子林

山之四旁  
皆植橘柚

繞山種橘樹枝葉團陰森霜後熟纍纍萬顆垂黃金江  
陵莫專美龍陽已成林摘來贈親友義帖不須臨

藕花洲

山下有洲  
皆植蓮

種藕繞芳洲藕生綠荷長南風催花發十里聞清香飲  
客折碧筩解醒啗雪霜眷言君子心千古同芬芳

桂山詩

桂山何奇哉峰巒起平地星羅數百里像物非一類列  
柱擎空高圓屏障天翠尖分筆格巧稜削劍鋒利海螺  
爭獻新玉笋並呈瑞重巖垂萬象深洞容百騎河變梁  
猶存關徙門未閤還多怪異狀物類無可譬石罅瀉寒

泉清響更幽致丹青筆雖妙圖畫良不易想當開闢時  
清濁各奠位精華妙凝結旁礴隱深粹洪水滔天流壅  
土日消墜歸然不可動叅雜如布置儒先歷覽多載籍  
有題識仙都鴈蕩景角勝須在次始知寰中山奇絕更  
無二所惜在荒遠世人少瞻視我慚本書生承乏當間  
寄提兵靖百越黽勉幸成事性愛山水遊羈絆弗能遂  
故茲佳勝境六載始一至駭目驚心神欲去還默記豈  
徒玩物理亦欲長仁智況逢休明時德化廣漸被九州

安耕鑿四海息烽燧乘閒此遊觀冠蓋總賢使相與片  
時樂感激知所自走筆題新詩磨厓刻深字非追浯溪  
頌聊補桂林志

知止為鄉人陸仲璣題

我嘗戒盛滿深恐近危辱因之號知菴恒警知止足陸  
生江湖士何苦志亦篤生嘗從我游我識此心曲世業  
甘自守分外非所欲苟求若臨淵却步如執玉好禮極  
清致親賢異流俗保終誠德人煩生尚加勗

成化七年秋八月自梧州出巡至平樂歷諸險灘  
憫舟子勞甚感嘆有作手書于郡學示知音者

樓船發蒼梧江水何湯湯清灣不時轉石灘險非常顯  
伏羅虎兕叅錯森劍鋌砮轟地出雷沸騰釜揚湯夾岸  
山壁立澗谷緣其傍深隄力難為無路兼無梁引纜既  
弗能操槳亦有妨篙師極力進羣叫如發狂道甫逾半  
千灘數百十長繼旬始能達疲憊已莫當雇直僅足食  
曷有贏餘粮所幸得無虞勞損不自傷長江有巨賈連

舟豎危檣開帆趁好風破浪飛汪洋無煩役心力倏至  
千里疆得售重利還里閭誇富強一時或不戒傾摧見  
災殃乃知覆載間人事誠眇茫淹速雖靡同夷險未易  
量因之發警悟省己益不遑盡瘁固所甘幸致非所望  
循理聽自然終始永弗忘

道崇德將走謝夏大理掣肘興闌中止

甲午十月  
九日也

別去忽五月悠悠勞我情相望纔咫尺何如難合并推  
窗看明月月落參已橫公事未易了悵然憶平生

感君極愛我新句累百言一筆不苟簡兼之叙寒暄當  
宁春老成相將入詞垣為草嚇蠻書壯觀顏平原

襄毅文集卷一



欽定四庫全書

襄毅文集卷二

明 韓雍 撰

七言古詩

題簡菴王先生折桂圖

團團明月夜漏長森森仙桂秋風涼碧玉枝搖兔窟影  
黃金花噴龍涎香廣陽先生志勤苦豪氣直接清虛府  
讀書養就郗詵才成名不用吳剛斧青雲繞足躡丹梯

聳身平步非攀躋一枝月裏手親折百人榜上名高題  
歸來天香滿衫袖簫鼓懽迎綢晴畫故園桑梓增餘光  
泮水菁莪誇獨秀有如滄溟起鯢鵬乘風簸浪爭騫騰  
扶搖萬里一翅力喧啾百鳥知誰能又如渥洼產騏驎  
逐電排空難控制康莊千里一日程齷齪駕駘甘自棄  
亨衢發軔從此通明年挾策遊南宮瓊林深處春如海  
一枝還折狀元紅

愛葵為姚御史鵬題

古聞御史臺名蘭又聞御史臺列栢文章御史獨愛葵  
豈愛葵花好顏色臺端五月花正濃繞堦淺白兼深紅  
太陽行空轉傾向花心正與吾心同吾心愛君亦忠赤  
欲格君心輔君德激揚繩糾皆為君誓比葵花恒向日  
勗哉御史彈厥心栽培此花永規箴花有枯榮性無改  
莫愁花老風霜侵

題湖口下鐘岳白雲亭

山僧鑿開白雲根因之作成白雲亭亭中白雲掃不盡

朝朝暮暮飛冥冥昔曾飛向金陵郭映水搖城動高作  
又曾飛到黃鶴樓載却仙人入寥廓于今亭畔雲常籠  
登臨便覺騰雲中天風一吹忽飄散頃刻變化如神工  
當窓獻瑞成五色直上青霄捧紅日出戶從龍作霖雨  
四海蒼生被膏澤雲兮雲兮爾誠奇見爾使我增歔歔  
未能乘爾帝鄉去又空望爾吳東飛

慰同寅余公喪子

昔有東門吳子死無憂情又有卜子夏哭子乃喪明古

人失子同切已哭與無憂不相比千載斯文較是非東  
門知命卜昧理君家翩翩好鳳毛一朝徑赴瓊樓招雙  
親哭子兄哭弟滿堂淚雨長悲號人生百年如夢覺此  
身朝夕亦難料三槐五桂終塵灰子女存亡何足道君  
方與國為棟梁莫因無益空毀傷且與故人同一醉明  
遣玄夫問蒼蒼

九鷺圖為孟儀賓題

有鳥有鳥名春鉏霜衣雪髮形清癯閒心只與鷗鳥伴

野趣不受樊籠拘恍如少府池邊立又似吳王鼓中出  
羣聚應憐芳草青孤飛點破空山碧國賓儒雅能得師  
平生方寸無邪思宣尼大訓寓此圖攜來索我題新詩  
李杜雍陶音已絕我欲題詩愧才劣但願取彼霜衣製  
羽扇一揮掃除四海蒼生熱

訪少卿李公因送予至小箬郵亭賦此贈別

平生懶與俗士交下視權貴如秋毫羨君文章冠天下  
急流勇退人尤高聯芳況有難兄在隱德香名重當代

林下優游日唱酬  
新詩還駕蘇黃派  
慚予淺薄無治功  
質疑問道期相從  
却憐聚散若風絮  
三載始得重相逢  
郵亭別君一杯酒  
企仰高風重回首  
後夜風清月白時  
君卧空山我奔走

送蘭菴先生至常山臨別情不能禁歌以洩之

常山山頭秋月明  
常山渡頭秋水深  
行人欲別不忍別  
兩意各忍無限情  
憶在灤河折楊柳  
三載相思百年久  
客中懽會能幾時  
何事匆匆又分手  
平生最感恩義深

年來赤膽懷君親，攀留無計隨不去。惟有水月如吾心，  
吾心如水日東注。遠送行舟浙西去，又如夜月光隨人。  
常照行人獨眠處，行過吳門上金鑾。煩報平安對素餐，  
此心未遂忠孝願。因別雙淚何能乾，明朝兩棹分江浙。  
愁向水邊看孤月，相親未擬情不禁。且須痛飲醉時別，  
胡文選葡萄為戴主事珪題

貳師將軍破西域，佳種傳來滿中國。上林苑裏栽更多，  
銓曹遺老曾親食。愛茲品味珍，且長朝回墨灑雲烟香。



盤柯蔓衍交密葉結實磊落垂濃光恍如青油帳幙攢  
翠羽又如黑水晶珠貫金縷清宵凝露墜龍鬚白晝騰  
霜籠馬乳戴君得之拱壁同求題愧我非詩翁解醒不  
羨魏文帝奉母空懷陳侍中

六月十三日德興道中苦熱小憩林下偶成

高堂廣廈六月寒我雖逸居憂素餐炎風烈日道路難  
我雖驅馳心始安却憐僕夫力已殫流漿滿背何曾乾  
馬頭紅塵滾雕鞍四蹄汗血尤汎瀾使我目覩心悲酸

停車解轡聊盤桓九州無人服冰丸蒼生多少顏無懼  
我欲大布雲陰寬吁嗟不能生羽翰

慶備倭翁都督

偉哉將軍翁繼武智勇元非衆人伍指麾陣勢風雲生  
笑談兵法虹霓吐寶刀曾斬滇池蛟琯弓慣射陰山虎  
出鎮聲華已絕倫閒居禮度尤追古輕裘緩帶年都督  
雅歌投壺祭征虜帳前列校總歸心海外諸夷誰敢侮  
斥堠久斷狼烟飛望洋不見鯨波舞畏威奸宄盡歛跡

向化黎元皆按堵聖主封功下丹詔將軍進爵垂朱組  
方今萬國固忠臣猶有四夷須鎮撫還期明堂領節鉞  
坐向邊陲立旗鼓誓使天驕不敢窺報功定見分茅土  
湖口阻風撥悶

江頭日日南風惡上下風帆總深泊行人欲渡未能渡  
獨倚蓬窗嘆蕭索寄語行人且放懷樽中有酒還須酌  
行止從來悉在天清閒真是浮生樂

題雪景贈陳雪軒南歸

凍雲茫茫天一色六出花飛繞天白山間林下無人蹤  
草堂獨卧江南客客過文範先生之賢孫養高樂道居  
衡門開軒掃榻曲肱卧左圖右史恒討論門前大雪隨  
風颺嚴寒不入芙蓉帳斜擁青綾足晏然遊神已在羲  
皇上披襟起望雙目開乾坤萬里無纖埃清光正與素  
心合以雪名軒心快哉雪軒雪軒世事不足道山林之  
下風光好僵卧休如袁邵公迎賓須似王元寶何當歸  
棹刺溪船登爾高軒掃取烹茶一傾倒

劉子鍾郎中嶰谷秋風竹為吳郎中題

大夏之西沅渝之陰有地名嶰谷產竹成修林蒼厓每  
見綠雲起白日不受紅塵侵七月八月風森森翠鸞飛  
舞青蚪吟瀛洲仙子振環珮商山隱者鳴瑤琴行看最  
能遠清聽入坐便可消煩襟比來此景不易得宦途渴  
想塵生心吳君早年登要津此君風節素所歆東平才  
子善揮灑筆端造化留情深欲君寶此如南金作官視  
此為規箴此君終當遇伶倫取之共和簫韶音

送鄉友李原善南還

客裏思鄉正惆悵故人忽自鄉山來入門相見驚且喜  
便問何日離蘇臺來時老親曾否見容顏比舊誰強健  
小弟真能養志無交游孰肯常相念君言親健思我歸  
難弟孝養真無違鄉閭月旦論人物數我情好而今稀  
我聞君言淚如注旋開書屋留君住悲盡懽生索酒來  
與君痛飲愁君去可憐住此未經旬鶯花看遍皇都春  
促裝南行留不得題詩送別偏傷神故鄉到日春應盡

高堂煩報平安信鄉人問我情何如夢繞江南幾多恨  
凱還圖為總兵官彰武伯楊公題

楊將軍不易得虎頭燕頤脩髯黑河目龜文神氣赤三  
光五岳儲精華生與皇家為柱石少事世父頴國武襄  
公六韜三略皆精通手提百斤武庫戟臂挽三石烏號  
弓有時射獵馳沙漠千萬人中顯英略南山白額赤手  
擒雲裏雙鷗應弦落有時策馬出塞遊殺氣凜凜橫高  
秋健兒望風不敢敵揮刀追斬單于頭弱冠登庸起聲

望每向行營護天仗艱危時復展奇謀上谷登壇為副將彼敵違天常西夏為奸驕將軍往節度一道人歌謠犬羊貪心猶未已舉國入寇平時比揮兵鏖戰却敗奔躍馬窮追數千里僵屍彌山血成川盡驅馳馬欣凱還獻俘奏捷天子喜報功遣使來窮邊賜賚便蕃未能數更進勲階錫茅土玄冠幾度加貂蟬金印三臺伏螭虎殘敵膽破夜自驚脫身北走無留停雲中長驅肆劫掠守臣安得逃天刑宵旰勤民深軫念在廷元老咨詢遍



堪茲重寄惟將軍  
台對文華隆寵眷  
尚衣出龍錦寶箴  
分南金大官珍羞  
羅良醞清香斟白  
麻黃麻頌紫禁將  
軍重佩征西印受  
降城中百萬家家  
喜得賢方鎮彼敵  
蜂屯近邊烽僭志  
猶欲窺南東將軍  
伏兵守要害聞風  
遠遁穹廬空塞垣  
不見狼烟起從此  
三邊甲兵洗聖主  
端無西顧憂萬里  
長城真可擬畫工  
模寫奏凱歸據鞍  
顧盼多風威山川  
草木動華彩旌旗  
戈甲生光輝君不  
見車騎將軍趙充  
國金城方略平羗  
賊振旅旋師報匪  
輕

麒麟高閣圖容色又不見大樹將軍馮公孫大破赤眉  
定三秦中興偉蹟不可泯南宮雲臺寫其真將軍勲名  
不在古人下雲臺麟閣終須畫此畫亦須寶藏之後人  
一觀千金價

夏太常竹為琴川錢允言題

坡翁作古人老可已陳迹誰言古今人才能不相及偉  
哉太常人中英筆端造化何其精傳得聲名滿天下世  
人翻視文蘇輕琴川隱君天下士讀盡詩書不求仕高

節清風似此君太常賜贈非無意家藏此君三十年隱  
君雖休子能傳傳來亦有父風節攜此索我題詩篇袁  
丹陽王子猷為愛此君名聲流君家父子德與此君侔  
我為作詩傳千秋

天順己卯端午節賜遊後山觀走解有作

六龍飛天天下覩皇度神威誰敢侮太平時節不忘危  
每值良辰猶講武五月五日時雨晴綵雲縹緲祥風輕  
萬歲山前闢馳道千騎萬騎皆長鳴翠華南來此中駐

詔許元臣同侍衛嵩呼拜罷玉笋齊馬上武夫爭獻藝  
雙雙立在雕鞍行馬馳人似康莊平背旗手戟影不側  
肩水頂火盆無傾畫角齊吹金鼓震發喊聲傳出奇陣  
飛鎗烟過如電驚流砲星馳若雷迅一人驕躍三馬過  
兩人扶抱一馬馱馬中一老傍四少鍾南進士降羣魔  
雙馳上下如相翮相參換馬如相庀倏然挾取一人過  
諸葛武侯擒孟獲倒身腹底穿周遭老蛟捲樹翻洪濤  
折腰斜從項下過下出猛虎聲咆哮有時截身在金鎗

有時控馳若驟乘有時倒立雙足擎有時偃仰四肢定  
羣馬出獵爭騰驤馬馱獅豹皆人妝饑鷹一掣墮鵬鷃  
良犬纔縱空豺狼輕便巧捷紛紜去險狀難名亦難記  
軍中用此出前鋒斬將搥旗孰能禦平生肉眼未得觀  
觀此盛事人人懽總誇一時扈從樂更美千載遭逢難  
侍臣拜謝天顏喜大官賜燕聞天語御爐香裊簫韶喧  
龍馭徐行仙仗起侍臣步入文華南高筵廣席陳肥甘  
黃封御酒味香冽中官諭勸皆沈酣君臣同遊皇祖誥

與民偕樂聖王道我皇祖述且憲章恩德如天孰能報  
小臣有幸逢明時寸心感激深懷思謫才不作長楊賦  
微誠欲獻卷阿詩

送錦衣焦公子廷用還京師

霜風初收天氣寒長江萬里無波瀾江亭執手一盃酒  
送君解纜歸長安長安迢迢望親舍尊翁作官美聲價  
錦衣日侍鳳池頭寵眷雖隆心愈下君承家庭訓雅有  
文武才殺取賊奴受封賞我冠博帶何榮哉昨來覽勝

遊江浙吟盡西湖好風月匆匆又復趣行裝應念親庭  
久違別丈夫有志報君親世人未必知之真他年勲名  
滿天下始信江湖亦有人

洞庭君山歌和趙總戎韻

使君統師征不庭長江萬里飛揚舲重湖縹緲接紫冥  
風帆遙度一飯經船頭擊鼓如雷霆鼉鼉蛟龍皆隱形  
君山有樹高亭亭匠石不敢加斧釘就中巖穴雖崢嶸  
隱約巨浸如一星湘君之祠列宮庭靈異似若司南溟

長鯨能容李白騎仙槎曾說張騫乘東南形勝莫與比  
欲通道路無五丁乃知元氣自涵蓄潤澤何假行雨耕  
使君雅志凌空青睨視泰華如枕屏清風與明月相招  
時入船窗櫺衆人昏昏君獨醒欲將丹衷荅皇扁腰間  
三尺真青萍辟兵不用丸飛螢渴思整頓海宇澄乃今  
長驅掃膻腥將星昨夜光晶熒凱歌指日在耳聽茲辰  
共泊長沙汀萬馬不嘶風清冷知君此行不少停直指  
南服宣威靈瞬息鎮海皆清寧相期同躡鸞鳳翎慎固



九有如郊垌保我皇圖億萬齡與君相守歲寒盟令人  
千秋萬歲仰德馨

趙總戎見惠巨鯪酬之以詩

縮項鯪魚味最珍長江六月尤難得波濤洶湧風力勁  
漁人舉網空費力元戎統師百萬行秋毫無犯嚴戒飭  
庖厨空虛河伯知故遣嘉魚助鮮食我曹忝陪旌旆行  
此味從來不曾識元戎馳賜捧玉盤烹來大嚼深感數  
吁嗟此物成百頭真乃神靈來効職威聲從此收南邦

蜂屯蟻聚休言賊草草題詩謝來意紙短情長苦相逼  
趙總戎和前作見贈再次韻奉酬

世人淺見多相忌丈夫意氣自相得卓哉征夷真丈夫  
世人誰敢較才力天子臨軒親授斧一日兵戎盡修飭  
所期代天行王誅豈但解衣更推食舳艫百萬長江來  
走卒兒童總能識指揮三軍陳大義日日惟將忠義激  
三軍感奮若貔虎誰不深思効臣職馬援須標銅柱功  
晉公豈縱淮西賊金貂玉蟬公莫辭丈夫從來富貴逼

望衡嶽有感兼懷伯顓心友偶成鄙詩千里寄意  
我嘗持節巡塞北北嶽常山膽峻極我今提兵征嶺南  
南嶽衡山見奇特衡山奇特在目前三峯曉霧無嵐烟  
幾朵芙蓉浸空碧一條白練飛流泉峻極常山今想像  
彷彿危峰四千丈高鳥難侵絕頂飛古松特出層雲上  
常山在天北衡山在天南南北相望幾萬里十年走馬  
無停驂客中念此愁懷起呼酒高歌却還喜丈夫有志  
在四方飽食閒居我深恥知心之友松雪翁高懷雅量

與我同黃堂暫屈且寬慰扶搖萬里須天風

寄伯顯通政司趙參議

與君少同窗仕也復同朝朝行一日不相見左顧右盼  
心無聊有時往還坐書閣夜雨燈前動春酌有時聯轡  
看西山載酒攜琴恣遊樂于今各在天一方經年相望  
如參商君雖未起得閒適我却任重心憂惶我憂惶君  
閒適且各相期慎眠食鶯花爛熳皇都春遲我歸來與  
君樂無極

師次永州久雨祈晴有感贈趙征夷

君不見貳師將軍伐西域拔刀刺山泉湧出又不見虞  
公欲與夏人戰長劒一指停西日乃知人有忠誠心后  
土皇天相終吉桓桓將軍趙征夷文才武略當世稀昨  
承簡命佩金印貔貅百萬生光輝南來次師湘口岿驟  
雨連旬江水泛洪濤汹涌欲渡難泊舟雖驚總無患先  
鋒卜吉將啓行驟雨不息疑羣情將軍拜天訴忠悃雲  
開雨歇天清明旌旗映山谷鼓吹喧江灘將軍倚樓看

解纜順流西下無狂瀾軍中感嘆稱稀有父老懽呼如  
一口兩廣三苗不足平百蠻重譯須奔走吁嗟此雨晴  
其事非偶然皇天厭禍亂助我解倒懸此雨驟於十日  
前汴流難上江灘船此雨驟於十日後行營水浸徒流  
連雨驟我休兵雨晴我耀武天意人心總和順會看一  
鼓成功報明主

平斷藤峽詩

人言斷藤峽險峻天下少我視斷藤峽培塿一拳小蜂

屯蟻聚千萬家跣足蓬頭盡猺獠數十年來肆猖獗三  
廣生民苦騷擾五征不克勢益張處處孤城未能保聖  
皇當天赫然怒選將提兵奉天討內外羣公總豪傑百  
萬精兵雄矯矯共言困守非良圖必欲長驅且深搥雷  
霆砰訇鬼神怒幾日羣山盡傾倒百鍊錮刀破新竹萬  
里長風振枯槁巖居穴處皆蕩蕩焚瘴霧蠻煙都汛掃積  
屍如山血如川誅夷只許留襁褓免竄狐奔網羅密我  
軍追戮如芟草大藤根株悉已斷五嶺封疆真再造振

旅班師歸柳營黃童白叟迎遮道自言固望來蘇久不  
圖便見成功早從今水陸是通衢來去行人免迂遠有  
田可耕山可樵共享承平永安好聖皇睿算天助順羣  
公整頓南荒了豐功偉績萬古傳附驥成名愧臺老

送少司徒薛公還京師

海珠寺前一杯酒送君奏凱還京師君還京師我獨留  
執手不忍遽別離與君一載同相處君總芻糧我軍旅  
同心戮力功已成共羨君才世無比積糧如山帛如丘



千金重賞先伐謀人言不殊蕭相國我道更勝張留侯  
平生節操清如許秋月冰壺真可擬蕭索行囊意甚空  
惟有圖書為伴侶海風飄飄瘴雨收乘潮解纜不可留  
揚揚意氣長嘯去道傍人羨如仙舟高秋入見天顏喜  
太常儘把奇勛紀三台八座定無疑從此皇恩常眷倚  
丈夫報國思致身江湖廟堂同此心君去我留不須論  
要取芳名冠古今

送主事謝芳

戍邊蕃將遠移家勞君將命來天涯天涯瘴癘人共惡  
君來不見興咨嗟君才落落人中傑不學時人附炎熱  
作官自是有賢名奉使尤能守清節匆匆聚首便趨裝  
畫船撾鼓辭五羊溟陽峽裏夜可渡紅梅關上秋空防  
太平氣象君都見莫似常年浪競戰且須遊覽錦衣鄉  
還應歸奏金鑾殿頭元老多故人相見為我道情真  
謫才不堪勝重寄只願歸老江湖濱

贈趙征夷凱還京師

桓桓將軍趙征夷人中豪傑軍中師一朝拜命佩金印  
提兵百萬來邊陲邊陲蠻夷流毒久保險為巢爭死守  
將軍奮甲獨先登百萬雄兵誰敢後陣前號令雷風奔  
日色晝暝天為昏馬蹄濺乾荔江水劒鋒斫斷藤山根  
兔竄狐奔彌百越網羅處處無疎缺坐看羣醜盡成灰  
萬里妖氛一時滅將軍振旅歸柳營黃童白叟皆懽迎  
自言生長亂離久不圖便見時承平人言將軍有神力  
殺氣稜稜厭羣賊賊中遙望畏如神狄青銅面何須飾

藤山磨厓紀厥功賊黨不敢窺其中從茲兩廣正疆界  
馬援銅柱翻成空將軍偉烈超今古馬援狄青何足數  
聖主纔無南顧憂錫封定見分茅土贊軍臺老不知兵  
却喜心同見功成題詩送君凱還去天涯萬里難為情  
成化三年春予駐師梧江之許截竹為杙以障土堦  
未幾竹復生者三十有三本枝葉茂密森森可愛從  
事諸君為予作亭題曰瑞竹子因作詩紀之

此君之性難移植移植從來皆有術子美曾言臘月栽

廷堅亦說須辰日醉迷之日移更嘉非時鮮得抽萌芽  
如何斧斤所斷插江澣又見枝葉生枯槎化工生物非  
無為異物非妖即為瑞此君素有君子操草木之妖難  
比類天兵煌煌南越平邊民垂死皆更生江湖必有棄  
置君子起相與戮力匡文明坤軸氣盡回天心真厭亂  
生賢濟民兆已彰不信百蠻猶敢叛君不見廣陵芍藥  
金帶圍世無此種人稱希嘉祐諸賢應兆起太平勲業  
流光輝作詩示我同心人世間有事皆可為鞠躬盡瘁

荅明主勿俾前賢專美於當時

中秋文會為朱揮使昆仲題

天風吹開萬里雲一輪華月秋平分  
朱家昆仲設尊俎滿堂賓客皆斯文  
斯文濟濟多才傑握手登堂先看月  
高捲珠簾問月明何不常圓有時缺  
盈虛消長理自然月雖不言心已傳  
且將美酒勸賓客請客為我題詩篇  
須臾酒酣興如渴長篇短篇任批抹  
還疑風月寫不盡遍謁儒紳請題跋  
南樓老子興亦濃却恨年年在客中

行將歸老葑溪上與爾中秋文會同

梁御史二親雙壽詩

廣平太守人中豪芳年發軔由地曹功成名遂身早退  
清風凜凜何其高厥配宜人善為母雍肅齊家化鄉土  
偕老東平畫錦堂過古希年纔四五黃金作帶橫緋袍  
明珠裂冠攢翠毛雙雙鶴髮對晚景共誇曾荷鸞書褒  
膝前令子廟廊器豸繡為衣頻奉使賸有清名榮及親  
便道還鄉慰親志玉缸春酒葡萄香馳峰鳳髓華筵張

金史口人合言  
卷二  
繡綵當筵共稱壽泰山暔暔共輝光望泰山祝親壽推  
恩指日定加封壽與泰山同永久

與馮憲副朱揮使昆仲遊東禪

幽懷不能遣與客遊東禪東禪景何如繚繞水竹籠雲  
烟東堂長老號玉田精彩矍鑠神氣全忽聞門外車馬  
聲倒屣迎我忻忻然自言門巷好杉樹親手栽植今參  
天登堂坐我蒲團上妙香香茗時時傳喚來高徒聽上  
人頤指氣使勤周旋須臾開筵列尊俎款留甚覺心誠



虔英豪憲副天下士老成揮使人中賢更誇玉雪美公  
子好詩好禮今無前攜得仙家施小童長歌大雅聲清  
圓玉田歡感呼行者青天歌舞齊聯翩一派仙音衆側  
耳重斟美酒烹肥鮮案頭石硯壓錦箋墨漿如膏筆如  
椽諸僧羅拜不肯起闌門索我留詩篇君不見遠公結  
社住白蓮一招靖節賢名傳又不見昌黎有書遺大顛  
美譽烜赫垂千年愧我無能繼古作愛此光景徒流連  
草草留題拂衣去何須更問三生緣

訪沈南齋東禪無聞上人方丈有作

昨曾訪東禪東禪方丈居西偏羣僧瑣瑣不足數但覺  
玉田和尚賢今晨復訪東方丈無聞長老尤高尚三寸  
龐眉映雪顛純誠實有真僧相人言無聞世少雙一生  
戒行如冰霜沾泥柳絮吹不動春風上下空顛狂南齋  
詩伯常來住好詩好畫留無數促我題詩警衆僧衆僧  
酣卧知何處

橘杏雙清為儒醫傳澤民題

莫言蘇耽神漫說董奉仙惟我葑溪南國醫世稱賢以  
醫名世三十載軒岐道術何精專開闔陰陽指間妙幹  
旋造化心中玄回生起死已萬千何須橘葉吞清泉家  
有恒產皆良田曾輸萬石周荒年天恩煌煌賜冠冕杏  
林換谷名空傳琴川高士感德偏買橘買杏栽庭前綿  
州太守作佳畫刑曹司務題長篇想當雨過碎錦錢結  
實宛如紅蠟圓寒霜作威葉不變黃金萬顆纍纍然此  
時此景清且美相對不覺塵煩蠲開芳樽列綺筵旋

烹肥時摘鮮東鄰西舍三五友日常醉倒林中眠何時  
使我參其間我將世事祈蒼天疲癯殘疾誰能痊鰥寡  
孤獨尤堪憐蘇董于今果未死招起授我神方全我將  
以之遊八埏廣濟天關并顛連

憶秋谷東其高徒陳紹禎

昔遊中吳第一山主山都紀張秋谷開門迎我車騎進  
掃榻坐我林間屋我觀秋谷心休休仙風道骨非凡流  
出岫孤雲裊晴晝倚天長劍凌清秋笑懷頓覺高懷放

淪茗焚香與酬唱時出瑤琴彈古音旋開碧爰浮春釀  
酒闌便與秋谷辭弟子羅拜皆仙姿就中獨見陳紹禎  
風骨彷彿同其師別來十載今重訪秋谷仙蹤已長往  
蒼松老桂尚依然撫景令人動遐想乘鸞乘鯉未可知  
蛻形想似陳希夷還須夜夜望雲表恐有化鶴歸來時

仙舟詩為郭汝禎賦

郭君之舟新且美乍入真如洞房裏愛君兄弟義氣多  
與君同泛吳淞水外臺牙繡名四方南隣金玉誇同鄉

我弟亦是錦衣客開樽滿座生輝光臘雪初晴風力壯  
遠山近山如玉障寒極翻疑酒力微情懽不覺詩懷放  
紅爐再擁銀燭燒勸酬已到夜寂寥東君猶自不滿意  
密戒舟子徐徐搖吳淞萬頃孤舟漾櫓聲搖月吳歌唱  
彷彿陶朱入五湖依稀博望來天上喧闐鼓吹歸渡頭  
傍人嘆羨如仙遊煩君勉效郭林宗我名此舟為仙舟  
送張僉憲永錫三考滿入京

我昔提兵征百蠻勞君策馬來從事愧我雖無裴度才

愛君實有昌黎智獻謀獻策資戎機  
頤指諸將誰能違  
須臾成功報天子捷書露布皆君揮  
君才落落人爭羨  
況是臨我曾督戰恩賞雖加秩未陞  
恨我東歸未能薦  
我重拜命來天南為君滿去卿停驂  
一軍相顧皆嘆惜  
廣人戀德情何堪我聞無數攀留意  
已具民情訴天使  
天使封章達聖聰廟堂虛位應專俟  
蒼蒼之天不負人  
從來久屈多大伸梅關尊酒且別去  
相期聯步趨嚴宸

春江會別詩

有序

天順八年春雍以兵部侍郎出為浙江參政時簡菴王先生亦參政山東雍至德州以書奉報而先生已東巡海上得報宵征追至濟寧及之留連數日送至魯橋驛揮淚而別未幾雍奉命復官都臺提兵征兩廣既平就留巡鎮而先生亦以內艱改湖廣不相見六載矣戎馬簿書之間憂勞萬狀頓成衰疾而於先生恒懸懸焉去歲雍以先人棄特得請歸守制歲暮忽蒙恩詔進官復總督兩廣軍務兼理巡撫雍以服制



未終已上章辭免陞秩乞留終制勉就道以俟命適  
先生以使事入京回亦取道姑蘇遂得聯舟南行幾  
二十日至鄱湖之鄒子驛即有南北之分感平生教  
道之恩義惜良會偶然之不久而重仰先生平日守  
道聽命不隨時以希進而雍之取法亦少得焉不覺  
浩然興發走筆成詩未復致期待之意者先生平日  
與雍講明之素志非誇也酒酣解舟書以奉贈

相會纔幾時相違又明旦如何骨肉情恒有離別嘆昔

佐兵曹曾左遷道出齊魯心懸懸紫薇堂中驛騎發魯  
橋追送皆潸然當時起拜南征命亦聞轉佐湖藩政百  
萬王師勞指麾間濶多年已衰病歸來廬下心正哀誰  
知恩詔從天來越南萬里總巡鎮兼權自愧非全才楊  
柳初青梅始白旋整旗旌行計迫恰遇朝天騎從還聯  
舟共作江南客翦燭聽夜雨推篷看春山宦途聚散三  
十載無如此會多歡顏舟人忽報明朝別帆指西南分  
楚越萬頃鄱湖不共遊虛負清風與明月明宵風月各

一方我懷恩義心茫茫且須今日盡杯酒壯心莫為離  
情傷此心從來金石比附勢趨炎所深恥暗裏前程聽  
自然舉世相知能有幾方今士論亦已公聖主側席思  
英雄雲霄有日重相會圖報務欲輸精忠

同年王參議孟育從事軍中久矣今陞左參政予與  
總鎮兩廣太監陳公總兵官平江伯陳公重其為人  
而惜其去載酒餞行詩以華之

壬戌之春金榜開百五十人同日喜三十年來漸凋謝

落落晨星不多矣憐君素有冰蘖操作官久淹甘自己  
方今用賢尚恬退忽報喬遷向南鄙我聞滇南古夷地  
皇明撫有非昔比君能治理如中州風俗應須變淳美  
瘴烟初消天日明碧水丹山照金紫青油幕下行裝發  
囊篋蕭條只圖史府僚諸老尚含情況我情懷曷能止  
江亭一杯聊叙別浩浩長風布帆起到時若上五華山  
東望傳書慰知己

慶南京大理寺卿夏公季爵致仕詩

有序

公與雍登春榜同年仕同朝陞大理同寅辱公知愛  
迴異常輩而公之學識高遠詞翰超絕雍心悅誠服  
者也公今功成名遂決然勇退而雍淺薄衰朽上章  
乞歸未蒙俞允視公不能無愧焉因浩然感發作詩  
寄贈他日得從公遊吳山西湖之間始信予言之不  
妄也

與君同年最交契羨君才識超當世喜君辭老得還鄉  
東望吳山促歸計想當正統壬戌春禮闈一見即相親

廷對作官有先後感君教益非常倫君才相是文章伯  
游藝詞林聲烜赫灑翰真追王右軍作詩不讓陶彭澤  
兩京棘寺當勞煩盡心讞獄人無冤戴胄忠清允執法  
有功仁恕多平反昨來奉勅巡江右使節勤勞聲績茂  
貪吏都除政一新疲民盡起懽如舊功名遂思故鄉  
明廷拜謁陳封章聖主憐君美風節賜君致仕歸錢塘  
錢塘風景甲天下君歸遊樂增光價捲幔觀潮鎮海秋  
扣舷歌月西湖夜我嘗遊宦歷覽頻鄉園況與湖山鄰

乞歸未遂懷我友不覺清淚沾衣巾君不聞造物由來  
忌美名大名久居良亦難所以越大夫扁舟五湖終不  
還所以裴晉公詩酒晝夜窮相歡體天之道戒盈滿浮  
名與我何相干煩君先報湖山知遲我歸去同盤桓

贈錦衣鎮撫林君以善詩

人言林君寫生巧我言林君詞翰好名聞夷夏三十年  
筆落人間比珍寶胸中造物如鬼神羣飛一掃皆逼真  
景隨意到千萬態黃筌崔白安能倫興來走筆題佳句

三峽倒傾留不住電光爍爍蛟龍飛  
賞蟲張顛見猶懼  
錦衣日侍蓬萊宮累朝寵遇誰能同  
大烹肥羊良醞酒  
日日醉飽春風中却想家林別多載  
歸夢時時飛嶺海  
聖主恩憐許暫還粵南山水增光彩  
昨來相會五羊城  
龐眉皓首神氣清盤空老鶴出塵表  
想應有訣修長生  
古來一藝能名世況君衆善兼多藝  
高名准擬流千年  
遐算還看過百歲君將赴召趨神京  
預作歌詩送君行  
五雲縹緲一回首孤臣萬里難為情



送宗器張方伯之浙江兼柬崇善劉方伯年況意  
見乎詞

瘴雲初收殘雨歇張君別我遊江浙平生壯志輕別離  
為惜君才心鬱結君昔作官守四明我來浙省聞君名  
紫薇堂上一相見識君真是人中英踰時我拜南征命  
君亦來參廣藩政師行日費藉君多我得迅掃蠻烟淨  
廣人被澤方歌謳浙人望治思未休一視同仁徇民願  
進官移地君知不君才本是廟堂具歷試想應圖倚注

海內猶多事可為好竭精忠荅知遇同寅方伯我同年  
十載不見心茫然丈夫志定會有合相期話舊五雲邊

慶朱良德壽五十

正月十一日初度

去歲我當知命年朱君寄我慶壽篇今年朱君慶知命  
越南萬里心惓惓豈無一尊酒可以奉壽筵暮雲春樹  
空入望無由縮地憑書傳想當新正甫踰旬祥光瑞氣  
騰吳天元宵尚隔三四日君家堂上燈先懸傾城人喜  
初度好車馬雜沓來羣仙簪纓踴踴總名宦韋布楚楚

多英賢蓋世文章列大軸驚人詩句堆華箋朱君見此深  
感悅難兄友愛尤忻然自言我嘗逢此日我弟執禮心  
誠虔今辰景好客又好款留敢惜囊中錢大開天光雲  
影亭長筵廣席羅芳鮮主翁勸客客酬主洞庭春酒來  
如泉謾熬沈檀引飛鶴高燒絳蠟催鳴絃歌悠揚舞蹁  
躚藏髓籌莫算分韻詩重聯捲簾笑看孤南星似覺瑞  
彩光於前壽徵已見心益喜不惜醉倒先歌眠夜深酒  
闌客散歸又報有客來相連送迎款洽累數日里閭誰

不稱君賢玉雪子賢比肩愛爾同氣心不偏友恭之義  
能兩全高風應使薄俗化芳譽贏得儒紳憐安得天  
下同此風坐看民俗如古先老我平生半遊宦每逢初  
度心悽然何當歸老葑溪頭與爾此日相周旋況爾昆  
仲壽綿延方升之日方至川西嶺千秋不改色藍田百  
世常生烟

壬辰歲午日與林錦衣飲於行臺喜雨堂林乘興爲  
予揮扇面悵然有感書此贈之

憶在先朝逢午日萬歲山前常扈蹕綵絲錦囊賜新扇  
寫生都是林良筆鼎湖龍遊倏九年林君與我各一天  
喜雨堂中忽聚首又逢午節皆泫然舊恩未報新恩疊  
萬里炎荒戀丹闕須臾酒酣豪興起為我揮毫掃明月  
吁嗟林君畫入神一筆真可當千金惟我得多永珍藏  
君恩友誼千年心

五月十六日與林錦衣食荔支偶成

海邦荔支品多美絕美無如進奉子南人慣識已誇羨

北人初見尤驚喜剝開鷄卵玉滿芭嚼出瓊漿香澣齒  
解醒消渴日千顆未許楊梅雪梨比憶昔永元天寶間  
貢出西川與交趾十里五里一置堠人馬困頓多道死  
此果得名想此時諷諫有詩載青史我朝列聖鑒往事  
窮荒獻味皆禁止大庖九鼎羅八珍果核時新亦無此  
我曹何幸得飽啗念所從來感恩耳作詩寫贈知人心  
無奈心馳天萬里

送夏官郎中葉廷茂還京

葉君風儀何楚楚早歲登科入樞府滄海明珠天下珍  
丹山彩鳳人爭覩才高績最登大夫職方萬里時披圖  
九伐簡書勞鉅筆軍國重事資嘉謨昨承簡命來南國  
選送降胡助誅賊梁公雲起促歸心張翰風高急行色  
錦衣過鄉天已霜黃柑紫蟹薦壽觴受封雙親足怡悅  
九峰山色增輝光却憶匡南曾聚首共泛鄱湖醉春酒  
瞬息流光十八年君處清華我奔走蒼梧重會又別離  
把酒話舊情難為廟廊虛位正相待好展經濟匡明時

送平江陳總兵

偉哉偉哉陳將軍少年學武兼學文養成天才襲封爵  
一出便見超同羣登壇小試萬人師克効勤勞守廉介  
簡在宸衷任愈隆開府蒼梧膺大拜來臨百粵氣益充  
號令所至皆成功蠻夷畏威不敢起始知世有真英雄  
邇聞漕運法多弊况復河乾盤剝費積債年年無計償  
貧軍狼狽空吁氣羣情却憶令祖翁當時開創河運通  
將軍家法必有得遠期步武收功同廷臣聞此交章薦



仰荷聖聰專倚眷纔看徵詔下嶺南已動歡聲滿淮甸  
人情望公大有為公行到日先何施掃除舊習正在已  
講求良法須從宜樓船遙遙泛秋水明月流光照行李  
道傍擁送千萬人誰不沾巾重稱美錦衣玉節過南京  
旋除宿草拜先塋塋前有祠泣且告誓圖克肖延家聲  
君不見蕭何關中給饋餉元功位次先諸將又不見寇  
恂河內轉運足丹青畫像雲臺上丈夫富貴何足言要  
使中外慕風望

題家藏夏仲昭竹


我昔乘驄按江右仲昭來作筠陽守當時寫竹獨擅名  
自昔非人不輕授一朝趨拜容臺命南浦樓前遠相覲  
贈我朝陽舞鳳圖疑似簫韶九成奏家藏倏忽廿四載  
素絹雖陳墨如舊茲晨拂拭懸素壁爛熳輝光動晴晝  
千仞翔來覽德輝九苞振起鋪文繡須臾颯颯起風雨  
又似虞廷弄清味光價真追老可蹤聲華豈在坡翁後  
公又已為泉下客白璧黃金亦難購老我題詩遺子孫

觀物思人淚沾袖

成化七年冬戶部主事李君士美奉璽書清財賦  
於兩廣廉而有為嚴而不苛賢聲聞于朝即有員外  
郎之擢君感激益勵凡兩廣二十郡之地冒暑雨衝  
瘴毒早夜兼程遍歷無遺所至人不敢干以私而搜  
剔奸蠹無能隱蔽繩之以法倉庾肅清亦未嘗執已  
見以及非辜誠才德兼優之君子可重也于其歸賦  
詩送之兼致予意

嶺海窮冬變風色瘴烟滅盡梅花白行臺日長羽書簡  
載酒遠送朝天客客乃金曹粉署郎早登科甲隨班行  
作官今已八九載共誇節操非尋常昨捧天書下南越  
兩度歲華猶未歇馬蹄踏遍瘴鄉雲所至無人敢私謁  
千倉萬箱總較量寸絲尺縷無遺忘兩藩財賦清似水  
英聲先已蜚巖廊聖明因此知才器特進一官員外置  
遠大從今未可量好與皇家圖濟利國朝財賦取最寬  
可堪水溢兼旱乾東南已嗟民力竭西北更苦供輸難

司徒年來亦難處左區右畫勞心緒君還有策莫憚言  
報國須當以身許



襄毅文集卷二